

## PA.CON II

### Počela implementacija projekta PA.CON II

Na području Nijemaca u Hrvatskoj, Tuzle u Bosni i Hercegovini i nacionalnog parka Lovćen u Crnoj Gori tokom naredne dvije godine biće implementiran projekat Pannonia-Adria Connection II - PA.CON II. Vodeći partner na projektu je Općina Nijemci, dok su ostali partneri Grad Tuzla, Udruženje za razvoj NERDA, Centar za zaštitu i proučavanje ptica i Javno preduzeće za nacionalne parkove Crne Gore.

Ukupna vrijednost projekta je 2.148.481,20 EUR. Projekat je kofinansiran iz 1. Poziva Programa Interreg VI-A IPA CBC Croatia - Bosnia and Herzegovina - Montenegro 2021-2027 sredstvima ERDF i IPA III fondova Evropske unije.

Cilj projekta je doprinos razvoju održivih turističkih aktivnosti jačanjem socio-ekonomske situacije i unapređenjem turističkih usluga i infrastrukture prekograničnog područja na tri projektne lokacije. Ulaganjem u infrastrukturu, promocijom lokalnih resursa i kulture, obezbeđivanjem ekonomskih benefita za lokalno stanovništvo, edukacijom zainteresovanih strana i ciljnih grupa, razvojem kvalitetnih turističkih proizvoda i usluga, prilagođenih potrebama i interesovanjima turista, izgledi za održivi razvoj turizma će biti znatno poboljšani.

Planiranim aktivnostima predviđeno je unaprijeđenje dostupnosti odabranih lokaliteta za različite ciljne grupe, u smislu fizičke pristupačnosti i pristupa informacijama i novim turističkim sadržajima što će biti postignuto kroz atraktivne, ekološki prihvatljive usluge koje imaju za cilj promociju rekreacije i aktivnosti na otvorenom. Instaliranjem tematske opreme i interaktivnih načina komunikacije sa turistima bit će osiguran inovativan pristup zajedničkoj turističkoj ponudi i sadržajima koji budu kreirani u okviru projekta. Unaprijeđena regionalna biciklističko-pješačka ruta će biti povezana sa ostalim važnim turističkim atrakcijama u sve tri zemlje, čineći je sastavnim dijelom zajedničke turističke ponude

Implementacija projekta je zvanično počela 1. septembra 2024. godine i trajaće 27 mjeseci. Više informacija o Programu Interreg VI-A IPA CBC Croatia - Bosnia and Herzegovina - Montenegro 2021-2027 moguće je naći na: <https://interreg-hr-ba-me.eu>

---